

ACORDO DE COLABORACIÓN ENTRE A FUNDACIÓN PÚBLICA URXENCIAS SANITARIAS DE GALICIA-061, CRUZ VERMELLA ESPAÑOLA E A SOCIEDADE ESPAÑOLA DE CARDIOLOXÍA, PARA O FOMENTO DA FORMACIÓN EN RESUCITACIÓN CARDIOPULMONAR E INCREMENTO DA CAPACITACIÓN NO USO DE DESFIBRILACIÓN SEMIAUTOMÁTICA

MEMORIA XUSTIFICATIVA

O xerente do Servizo Galego de Saúde, **DECLARA:**

Que a Fundación Pública Urxencias Sanitarias de Galicia-061 (FPUSG-061) formalizou o 22.11.2019 o acordo arriba referido coa Cruz Vermella Española e coa Sociedade Española de Cardiología, por un período de vixencia de catro anos a partir da súa sinatura, podendo prorrogarse por un período de ata catro anos adicionais salvo denuncia expresa dalgunha das partes.

Que o instrumento convencional ten por obxecto establecer o réxime de colaboración entre a FPUSG-061, a Cruz Vermella Española e a Sociedade Española de Cardiología para a promoción da formación e difusión do coñecemento das técnicas de reanimación cardiopulmonar (RCP), con atención especial ao incremento no número de desfibriladores externos semiautomáticos (DESA) dispoñibles, así como do persoal capacitado para o seu uso.

Que existe converxencia de intereses entre as entidades asinantes en orden á consecución do obxecto referido.

Que o instrumento convencional que se pretende asinar se fundamenta no seguinte:

A morte súbita por parada cardíaca (PC) representa un problema prioritario para a saúde pública. Calcúlase que en España prodúcese anualmente preto de 24.500 PC, o que supón unha cada 20 minutos. Cada minuto que pasa calcúlase que a supervivencia das persoas que sufriron unha PC redúcese nun 10%. Nos casos en que a PC é causada por unha fibrilación ventricular (FV) ou unha taquicardia ventricular (TV) sen pulso, a desfibrilación eléctrica precoz é o único tratamento eficaz, sendo a súa precocidade o factor que máis contribúe na supervivencia dos pacientes. A maioría das PC prodúcese en presenza de testemuñas. A experiencia acumulada nos últimos anos demostra a efectividade da desfibrilación precoz na recuperación dun ritmo cardíaco eficaz. Por outra banda, a realización precoz de manobras de RCP por testemuñas, alonga o tempo no que a desfibrilación é efectiva, e demostrou dobrar a supervivencia nos pacientes que padecen unha PC extrahospitalaria.

A Comunidade Autónoma de Galicia foi pioneira na lexislación e implantación de DESAs no estado Español, coa primeira regulación legal do uso de DESAs por persoal non médico mediante o decreto 251/2000, do 5 de outubro, derogado posteriormente polo Decreto 99/2005, do 21 de abril, o cal á súa vez foi derogado polo vixente Decreto 38/2017, do 23 de marzo, polo que se regula a instalación e o uso de desfibriladores externos fora do ámbito sanitario, e créase o seu rexistro.

A Consellería de Sanidade da Xunta de Galicia, a través da FPUSG-061, xestiona un programa de colaboración cidadá na atención da Parada Cardio Respiratoria (PCR) en vía pública denominado “Acode e Axuda”, que busca a axuda cidadá para mellorar a supervivencia das vítimas afectadas mediante a coordinación de persoas voluntarias desde a central de coordinación de Urgencias Sanitarias-061.

Pola súa parte, a Sociedade Española de CardioloXía desenvolveu, co apoio de Cruz Vermella Española, unha aplicación denominada “Ariadna”, coa intención de localizar e validar o maior número posible de DESAs en todo o territorio español, cuxa finalidade é difundir entre a poboación a importancia de contar cun número suficiente que posibilite acceder a eles se se produce unha PCR, así como propiciar a súa localización e a participación da cidadanía na difusión de todas as iniciativas que melloren a cardioprotección en espazos públicos.

En consecuencia, as tres entidades, de conformidade co exposto acordaron formalizar un acordo de colaboración no campo da formación, a aprendizaxe e a información pública da reanimación básica e o uso e localización de DESAs.

Os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria, en Santiago,

